

RELAZION 2022

ASSESSËUR STEFAN KASSLATTER

Chèsta ie mi relazion de mi lëur sciche assessëur dl Chemun de Urtijëi per l'ann 2022. Ulëssi ringrazie per la bona cunlaurazion l'ambolt, i altri assessëures y la secretera de Chemun cun si cunlauradësses. Ma nce i ufizes di polizais y dla ntredes cun chëi che ie ei ntan l ann l plu da fé. Ma sambën ne uei nce nia desmincé de ringrazie i altri ufizies che ie for dassën despunibli canche i adrova.

MOBILITÀ

- **Plaza S. Antone sënza auti:**
 - Cun l fin de purté plu segurëza, cualità dl'aria y cualità de vita n generel sun plaza S. Antone iela ntan la sajons turisticas da instà y inviern unida stluta ai auti. L pudova me plu furné ite la curieres de linia, chëi che sta ilo, i taxi, i shuttle di hotiei y i nvalic.
- **Plaza dala curieres dal Ladinia:**
 - L ie unit laurà inant sun l proiet de spusté la curieres da plaza S. Antone ora de viers dla Tresval do l Ladinia. I lëures va dl viers de fé duc i vars aministratifs per purté ite chëla spersa sciche zona de nteres publich.
- **Rodaval:**
 - Ntan i lëures de costruzion dl passaje sot'ala streda Tresval per l troi dala rodes iel unit autà duc i auti y la curieres de linia tres la streda Purger.
- **EasyPark:**
 - Per paie l post da lascé l'auto ulache l ie la risses brumes iel unit metù n funzion l system de paiamënt digitel tres app sun l fonin EasyPark.
- **Passaje Snoltner:**
 - Nce per cialé de ressolver l problem dl passaje sun la SS 242 dal Snoltner de viers de Sureghes iel unit fat vel ancunteda, sibe cun l ufize provinziel di ruves che cun la jonta de chemun de Ciastel. Tlo cialeran de ti sté do y purvé a abiné n cunsëns cun duta la pertes nteresades.
- **“Parkleitsystem”:**
 - L ie unit laurà inant sun l proiet per n “Parkleitsystem” per Urtijëi. L ie unit tëtù ite vel preventif, ma la problematica da ressolver ie dantaldut co la mèter a jì aministrativamënter davia che nia duta la garages y plazes da lascé i auti ie de puscion dl chemun.
- **Streda de zircumvalazion de Urtijëi:**
 - Do vester unit apruvà a gran maiuranza te cunsëi de chemun ie l stude de fatibltà de na streda de zircumvalazion de Urtijëi unit dat jù ala provinzia y nce prejentà de persona al assessëur Alfreider. Da sën inant saral pona cumpetënza dla provinzia de fé i proscimi vares sce la ulerà realisé chësc proiet tan mpurtant per smendrì l trafich sun la streda Tresval y purté plu cualità de vita ala persones che vif ilo ma nce a chi che muessa passé tres Gherdëina, nia me itevier ma nce oravier.

- **Telecameres che liej targhes tl raion a trafich limità:**
 - L ie unit dat la ncëria a na firma per mëter su telecameres al'entreda dl raion a trafich limità sun l col da Janon y pra la dlieja de S. Antone, che tol su la targhes di auti che ne ie nia autorisei a furné ite te chël raion y possa nscila unì straufei. N ie tl lëur de aspité l'autorisazion ministeriela da Roma per pudèi mëter n funzion l system.
- **Tenì cuntat cun l'ufize Mobilità dla Provinzia y la Lia dl Turism per la curieres:**
 - La bona cunlaurazion cun la provinzia y lia dl Turism va for inant per garantì n bon funzionamënt dla linies dla curieres nr. 355 y 356. Nscila iel nce unit dat na ncëria, deberieda cun i autri chemuns y lies dl turism de Gherdëina, a na persona che se cruzia dut l ann per cialé de miuré l servisc de trasport publich te duta la valeda.
- **Proiet "Troj da jì a scola n segurèza":**
 - L ie unit laurà inant sun chësc proiet y sciche prim var uelen fé sautiei acioche i auti muessa furné plu plan pra la strisces zebra dan ala scoles y scolines y nce ulache la trassa dla vedla ferata de Gherdëina passa via la stredes.
- **Curieres a strom:**
 - Do la delibera dl cunsèi de Chemun che dijova ala provinzia che a Urtijëi ulëssun l plu che la va curieres a strom iel unit fat na raida de prova su per l jëuf de Sela y ora da Ciastel sun la Mont de Sëuc. Tlo sperun che l vënie al plu prësc metù a jì almanco vel linia.
- **Puenc:**
 - Per monitoré y garantì la segurèza di puenc che on a Urtijëi iel unit nciarieda na firma a i cialé do y purté ite duc i dac te n software che ie unit cumprà y che juda al ufize competënt a tenì ite duta la scadënzes de canche l sarà ino da fé vel ntervënt. Ora de chël iel unida data na ncëria for ala medema firma de fé proves de pëis a chëi puenc ulache l mancia l colaudo dla statica. Chisc lëures unira fac tl ansiuda 2023.

POLIZAI DE CHEMUN Y UFIZE DLA NTREDES

- **Lëur cun i polizais de Chemun:**
 - Cun i polizais de chemun fovel for ino da se ancunté per se rujené y mëter n droa chël che la Jonta à fat ora. Ma nce resolver problemes che vën a se l dé ntan l'ann pra la viabilità dl luech y la lueges da lascé i auti.
- **Lëur cun l ufize dla ntredes:**
 - Tlo ruvel ntan dut l ann dumandes de ocupazion de grunt publich che vën cialesdes tres tl ufize dla ntredes y deberieda cun la Jonta dates pro ulache la va.

ARTEJANAT, ARTEJANAT ARTISTICH Y RAION ARTEJANEL

- **Proiet Val Gardena Woodart Center:**
 - Cun la grupa de lëur iesun jìc inant cun chësc proiet che à l fin de fé cunëscer mo de plu ora per l mond l'ert y artejanat dl ziplé de Gherdëina. N ie nce tl lëur de fé na grafica per na merca de garanzia per lëures fac te Gherdëina.

- **Raion artejanel:**
 - Tl raion artejanel ie unit vendù 2 loc a firmes da tlo y le ie unit fata na nueva graduatoria per purvé a vënder mo altri 2 loc.
- **Cuatieres de servisc tl raion artejanel Socrep B:**
 - L ie uinit laurà inant sun l dé la puscibilità de fé n cuatier de servisc tl raion artejanel Socrep B. Tlo iel mo da ressolver nvalguna problematiches, dantaldut per cie che reverda i posé da lascé l'auto che messerà unic mustrei su.

Urtijëi, 26.04.2023

Stefan Kasslatter
Assessëur de Chemun
(firmà digitalmënter)